

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Gauhati High Court Judge, Justice Michael Zothankhuma’n ND&PS Act, 1985 hnuaia thubuai hmachhawnnaa inkaihhruaina hman tur Standard Operating Procedure leh Flowchart vawiin khan a tlangzarh.
- 2. BJP Mizoram State President thar Dr K Beichhua MLA chuan vawiin khan Governor General (Retd) VK Singh chu a chenna in Raj Bhawan Aizawl ah a kawm.
- 3. IMD Aizawl Centre Director Pu Sudheer Kumar Dwivedi-a'n nikum fur hunlai aiin kumin fur chhungin chhiatna a tlem chhan chu Mizoram sorkar, thuthar thehdarhtute leh mipuite nen thawhhona a that vang a ni a ti.
- 4. External Affairs Minister, Dr. S. Jaishankar-a’n a firfiaka chetna chungchanga India ngaihdan khawthlang ram-ten an thlawp tha tawklo chu mak a tih thu a sawi.

<><><>

GHY HIGH COURT

Gauhati High Court Judge, Justice Michael Zothankhuma’n ND&PS Act, 1985 hnuaia thubuai hmachhawnnaa inkaihhruaina hman tur Standard Operating Procedure leh Flowchart chu vawiin khan a tlangzarh.

Tlangzarh inkhawm hi Mizoram State Legal Services Authority-in vawiin khan Aijal Club-ah a buatsaih a, Justice Michael Zothankhuma chuan he SoP hi Mizorama dan lova ruihhlo tawlhrukna hmachhawn kawngah a pawimawh hle a ni a ti.

Byte: Justice Michael Zothankhuma

Justice Nelson Sailo pawhin thusawiin tunlaiin Mizoramah ruihhlo man a pung nasaa ruihhlo mantu enforcement agency-te chuan ruihhlo an man kawngah leh chhuichian kawngah dan an zawm tur a awm a ni a ti a. Mizoram State Legal Services Authority-in a din Committee chuan, State hmalam hun ngaihtuah chungin, Enforcement agency-te’n State chhunga ruihhlo tawlhruk dona kawnga kaihhruaina atana hman tur Standard Operating Procedure (SOP) a buatsaih a, he SOP hian thil tum awmze nei tak a neih ngei a beisei tih a sawi a, he SoP ah hian ruihhlo man leh ruihhlo zuarte man hunah chauh ni lovin, hemi hnua zawm tur dan te thlengin a awm a ni a ti.

Byte: Justice Nelson Sailo

Kan corr report lo ngaithla ang.

VC

Ruihhlo kaihhnawih man tuma inkaihhruaina dan SoP an siam chhan hi ND&PS Act hnuaia man te hrem hleihtheih an nih thin loh vang a ni a, hei hi chhan ni a lang chu a dan kaihhnawih hriat fuh tawk loh vang te, danin tih tur ngei ngei a sawi te zawm kim loh vang te, chhuichian dan a fuh tawk loh vang te leh a dang te a ni a, hei vang hian pawikhawihtu ni a rinhlelh te man, dap leh hnu chhui chungchangah dan zawm kim thlap a ngai a, q kaihhruai nan Standard Operating Procedure mumal siam a ni ta a, ruihhlo Dap hma, Dap lai, Finfiahna lak dan, Sample lak leh vawn bakah chhuichian hna thawh tur te ziahlan a ni.'

<><><>

PEACE ACCORD

Ex-MLA leh Professor (Retired) Pu JV Hluna'n India leh Mizoram Inremna ziah chu Mizote tan a hlut em avangin MZP chauh ni lovin Sorkar leh Kohhran te nen Mizoram puma lawm a phu a tih thu a sawi.

Akashvani Regional News Unit in Remna Ni chungchanga Ex-MLA leh Professor (Retired) JV Hluna, leh Govt. Johnson College-a Associate Professor, Pu Lalrammawia Ngente te a kawmnaah he thu hi an sawi a. Prof JV Hluna chuan Pu Laldenga'n inremna alo hawna special provision ah chuan Mizote sakhua leh an khawtlang nun te, leh Mizo hnam dan te chu humhalh tur tih a in ziah avangin he inremna hi Mizote tan a hlu hle a, zalenna a pe a, tute tan pawh a ni a ti a. Remna Ni chu Mizo Zirlai Pawl te chauh ni lovin sorkarin buatsaih se, Mizoram puma lawm a phu a ti a ni.

Byte: Prof JV Hluna

Pu Lalrammawia Ngente pawhin Remna Ni chu India leh Mizoram an inrem theih nan Kohhran leh MZP ten theihtawp an chhuah nasa a ti a, inremna a awm theih na tura mipuite tawngtai nasat zia te leh political party hrang hrang te hmalakna thlirin Remna chu party bil ta a ni lova, tu sual chhuah bik a ni lo tih sawiin Mizoram pum huapa lawmna siam a phu a tih thu a sawi a ni.

<><><>

BJP STATE PRESIDENT MET GOVERNOR

BJP Mizoram State President thar Dr K Beichhua MLA chuan vawiin khan Governor General (Retd) VK Singh chu a chenna in Raj Bhawan Aizawl ah a hmu.

Dr K Beichhua chuan Governor chu State pachhia leh hnufual tak a nih avangin Mizoram in kawng hrang hranga hmasawwna a neih theih na tur a hmalakpui tur leh tandun pui turin a sawm a, Mizoram mipuite ei leh bar zawwna kawnga harsa tak takte hma khua ngai a, PM Modi hmalakna chhun

zawm a, Sabka Saath Sabha Vikas tih anga mitinin an chanvo diktak an chan theih na tur a hmalak dun ni se a ti a, Mizoram hmasawwna tur a theihtawp chhuaha hmalakpui turin a ngen a ni.

Governor General VK Singh pawhin Dr K Beichhua chu BJP Mizoram State President ani chu alawmpui thu sawiin a rawt ang ngeia Mizoram hmasawwna tur atana theihtawp chhuah a thawhpuia, tan dunpui a tum thu lo hrilh in, Mizoram a PM Scheme hrang hrang kalpui anih dan leh hmalak dan te pawh a tul anga enpui a, PM Scheme te ahlawhtlin theih nan a hmalak atul thu leh hruikhat vuana thawh dun a tul thu alo hrilh bawk a ni.

Dr K Beichhua MLA hi Pu Delson Notlia MDC, BJP National Minority Secretary in a tawiawm bawk a ni.

<><><>

SWADESH DARSHAN

Swadesh Darshan hnuaia Sakawrhmutuai tlanga skywalk leh Chaltlang leh Durtlang inkara ropeway siam chungchanga thubuai chu Mizoram Lokayukta thupek angin Anti Corruption Bureau (ACB) chuan a chhui mek a, chhui zawh hun tur hriat a la ni lo.

Mizoram Tourism Department thuchhuah tarlan danin Swadesh Darshan 1.0 hnuaiah hian project pahnih a awm a, ropeway leh skywalk te hi project hnuhnung zawk “Development of Eco-Adventure Circuit” hnuaia hna 152 zinga mi an ni. Ropeway hi Durtlang site hnuaia hna 16 zinga pakhat a ni a, Skywalk hi Sakawrhmutuai Tlang site hnuaia hna 19 zinga pakhat a ni.

Department hotute sawi danin he Project atan hian Central sawrkarin Cheng nuai 4953.10 a pechhuak tawh a, a project bultanna atan kum 2017 March thla ah cheng nuai 1981 pe chhuakin kum 2017 september ah cheng nuai 2482 a pe chhuak in kum 2018 september thla ah cheng nuai 489 pek chhuah a ni.

Hna hrang hrang thawh nan hian cheng nuai 9907 ruahman a ni a, heng zinga za zela 50 chu pek chhuah tawh niin thubuai tam tak a awm avangin sawrkar laipui chuan kum 2023 december thla khan he project hi alo ti tawp tawh a ni.

Tourism Department thuchhuah tarlan danin kum 2019 April chhunga pawisa pekchhuah zingah Skywalk a awm ngei an ti a, hnathawk turin contractor pahnih JV NEIP & Ropeway & Resorts Private Limited leh Lushai Engineer te chu rawih an ni a, contractor hian bill an lak tawh bakah heng bill te hi kum 2017 atanga kum 2019 chhung khan pekchhuah vek an ni.

Hetihlai hian Sawrkar hmasa hunlaia Tourism Minister Pu Robert Romawia Royte chuan Tourism Department thuchhuah chu a dik tawklo tih a sawi a, an sawrkar hunlaia sum pekchhuah zingah Skywalk a tel ve loh thu sawiin sum dang erawh an pe chhuak a ti a, ACB file ah Chiang zawkin a awm tih a sawi bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

IMD

Indian Metereological Department Aizawl Centre Director, Pu Sudheer Kumar Dwivedi-a'n nikum fur hunlai aiin kumin fur chhung hian leimin tam zawk mahse nunna chan zat a tlem zawk a ti a, hei hi IMD Aizawl Centre, Mizoram sorkar, thuthar thehdarhtute leh mipuite thawhhona that vang a ni a ti.

Akashvani Regional News Unit Aizawl-in a kawmnaahPu Dwivedi-a chuan kumin fur chhungin Mizoramah hmun 70 chuangah lei a min a, mi 5-in nunna an chan a ti a, kumin nen khaikhinin nikum Cyclone Remal thlen laia Mizoram hmun hrang hranga leimin zat chu a letin a tlem zawk a, hetihruah hian nikum khan leimin vangin mi 30 chuangin nunna an chan a ni a ti.

Byte: Sudheer Kumar Dwivedi

IMD Aizawl Centre chuan Mizorama media agency hrang hrangte leh Disaster Management te nen tangrualin, Mizoram mipuite hnenah thli tleh leh ruahsur nasa avanga chhiatna thleng theite laka fimkhur tura an inchah that thu a sawi a, thingtlang hmun hla tak taka awm te thlengin khawchhia avanga leimin, thing tlu, leh chhum zing avanga khaw hmuh fiah theih loh thleng thei chungchang IMD hrilhlawkna te an lo hriat phah a, hei hian nasa takin chhiatna nasa zawk thleng thei lakah a venhim phah a ni a ti.

India Meteorological Department (IMD)Aizawl Centre hi kum 2003 July ni 27-ah din a ni a, Aizawl office atang hian Lengpui Airport tana Aviation service te tan khawchin an enkawl a, Kolasib leh Mamit atangin loneitute tana khawchin hriat tur pawimawh te an tichhuak thin a, mipui nawlpuite tana khaw chhia avanga fimkhur tura thuchah leh khawchin te chu media agency hrang hrang hmangin an tichhuak thin bawk a ni.

<><><>

S JAISHANKAR QUESTIONS WESTERN NATIONS

External Affairs Minister, Dr. S. Jaishankar-a'n India-in a firfiaka chetna a dona, khawthlang ram-ten an thlawp tha tawklo chu mak a tih thu sawiin a firfiaka chetna dolet turin khawvel pum tanrual that a pawimawh tak zet a ni, a ti.

Washington-a’n thuthar lakhawmtute a kawmnaah he thu hi sawiin Dr. Jaishankar-a chuan ram thenkhatin mifirfiakte beihna an tawhin beihna tawk ve lo ramten an ngaihda an sawi chhuak tha duh lo fo thin, a ti a, India erawh chuan ngaihda nghet tak a nei reng tih sawiin India ram pawn khawiah pawh a firfiaka chetna thleng se, New Delhi chuan India ramchhunga thleng ang tho in hma a la thin, a ti.

<><><>